

四庫全書

子部

欽定四庫全書

事實類苑卷三十七

宋 江少虞 撰

詩賦歌詠

劉沆

劉沆與鄉人尹鑑少同場屋劉已登第大拜皇祐中尹以恩榜始登第劉以詩送之曰少年相款老相逢鄉舉雖同遇不同我已位登三事後君方名列五科中榮登莫計名高下宦達須由善始終若到鄉關人見問為言

歸思滿秋風

張師錫

張師錫年八十餘卒又有喜其子及第詩曰御榜今朝至見名心始安子能俱中第吾遂可休官賀客留連飲家書反覆看世科誰不繼得慰二親難

寇萊公

向敏中寇準同以太平興國五年登科向秉鈞寇以使相知永興軍向作絕句贈寇寇酬之曰玉殿登科四十

年當時僚友盡英賢歲寒惟有君兼我白首猶持將相

權

見青箱雜記

陳恭公

陳恭公執中以衛尉寺丞知吳州驛遞上疏乞立儲貳
真宗喜其敢言朔日臨朝袖其疏以示執政歎想久之
召為右正言然為王冀公所忌一日真宗賦御溝柳詩
宣自宰相兩省皆和進恭公因進詩曰一度春歸一度
新翠光長得照龍津君王自愛天然態恨殺昭陽學舞

人

宋子京

韓魏公知定州日作閱古堂自為記書於石後又畫公像於堂上宋子京知定州作樂歌十闕其一曰聽說山中好韓家閱古堂畫圖真宰相刻石好文章魏公聞之不喜

胡恢

金陵人胡恢博物強記善篆隸臧否人物坐法失官十

餘年潦倒貧困赴選集於京師是時韓魏公當國恢獻
小詩自達其一聯云建鄴關山千里遠長安風雪一家
寒魏公深憐之令篆太學石經因此得復官任華州推
官而卒

魏野

蜀人魏野隱居不仕宦善為詩以詩著名卜居陝州東
門之外有陝州平陸縣詩云寒食花藏院重陽菊遶灣
一聲離岸櫓數點別州山最為警句所居頗瀟灑當時

顯人多與之遊寇忠愍尤愛之嘗有贈忠愍詩云好向
上天辭富貴却來平地作神仙後忠愍鎮北都召野置
門下時北都有妓女美色而舉止生梗土人謂之生張
八因府會忠愍令乞詩於野野贈之詩曰君為北道生
張八我是西州熟魏三莫惜樽前無笑語半生半熟未
相猜吳正憲憶改郊詩云南郭迎天使東郊詔隱人謂
野也野死有子閑亦有清名今尚居陝中

朱台符

朱台符眉州人俊邁敏博少有

闕

各同輩課試以尺

正度其晷台符八寸而一賦已就凡有所作文字其彫篆皆類於賦章疏歌曲亦然河西作梗因上封事其略曰且夫結之以恩者彼必懷之示之以威者彼必畏之若爾則所謂繼遷者自當革面而束手款塞而來庭矣又嘗為闕數闕其略曰歌遏雲兮慘客在回雪兮腰一搦又曰顰多而翠黛難成望闕而烏雲易散本當闕身心兮牡丹期到如今兮賜冰頒扇鄉人日錫嘗曰朱拱

正一闕乃閨怨賦一首只少闕

錢熙

錢熙泉州才雅之士進四夷來王賦萬餘言太宗愛其
才擢館職有司請試上笑曰試官前進士趙某親自選
中嘗撰三鈞酸文舉世稱精絕略曰渭川凝碧早拋釣
月之流商嶺排青不逐眠雲之侶又曰年年落第春風
徒泣於遷鶯處處羈遊夜雨空傷於斷雁其文數千言
率類於此卒鄉人李慶孫為詩哭之曰四夷妙賦無人

誦三鈞酸文舉世傳

汪處士

文瑩至長沙首訪故國馬氏天策府諸學士所著文章
擅其名者惟徐東野李高弘邇遂得東野詩浮脆輕艷
皆鉛華歌舞媚一時樽俎耳其好句不過牡丹宿醉蘭
蕙春悲霞宮日城剪紅刻翠而已獨汪處士一篇庶乎
可採曰門在深松裏山僧幾度過藥靈丸不大碁妙子
無多薄霧濛寒徑殘風戀綠蘿金烏兼玉兔年幾奈君

何又得高弘雜文十卷皆播章繪句雖齷齪者亦能道

信乎文之難

見玉壺清話

徐鉉

太祖太宗下諸國其偽命臣僚忠於所事者無不面加
獎激以至棄瑕錄用故徐鉉潘昶修輩皆承眷禮至如
衛融張洎應答不遜獨優假之故雖陳遠寇讐無不盡
其忠力太平興國中吳王李煜薨太宗詔侍臣撰吳王
神道碑時有與徐鉉爭名而欲重傷之者面奏曰知吳

王事迹莫若徐鉉為詳太宗未悟詔徐鉉撰碑遽請對而泣曰臣舊事李煜陛下容臣存故主之義乃敢奉詔太宗始悟讓者之義許之故鉉之為碑但推言歷數有盡天命有歸而已其警句云東鄰結禍南箕扇疑投杼致慈親之惑乞火無里婦之談始勞因壘之師終後塗山之會又有偃王之比太宗覽之獨稱歎異日復得鉉所撰吳王挽詞三首尤加歎賞每對宰臣稱鉉之忠義吳王挽詞今記者二首曰倏忽千齡盡冥茫萬事空青

松洛陽陌荒草建康宮道德遺文在興衰自古同受恩
無補報反袂哭途窮土德承餘烈江南廣舊恩一朝人
事變千古信書存哀挽周原道旌名鄭國門此生雖未
死寂寞已消魂李王葬北邙江南錄乃鉉與湯悅奉詔
撰故有鄰國信書之句東隣謂錢俶也

黃孝先

宗袞嘗賞黃子溫詩子溫名孝恭天聖八年登進士第
為大理寺丞失官從兄子思亦善詩詠懷曰日者未知

裴令貴世人爭笑禰生狂

闕

句曰風簾燕引五六子

露井榴開三四花子思名孝先天聖二年登進士第終

太常博士

賈公餗

蔡文忠公擢進士第一以將作丞倅充將母之官年少
氣銳日沈酣以酒色廢務賢良賈公餗居郡中屢謁不
得見因書一絕屏間聖君寵厚龍頭選慈母恩深鶴髮
垂君寵母恩俱未報酒如為患悔何追文忠見之亟往

泣謝自是終身不飲酒

王君玉

王君玉琪詩務刻琢而深醇獨至高視古今每云初學詩易於形狀寫物而難於題贈至成一家言則反此君玉秋後蓮實詩蠶寒冰繭瘦蜂老露窠甜比興曲盡妙也他詩數百十首字字清奇讀之咀冰嚼雪若魚寒不食清池釣鷺靜頻驚小閣棋聞角詩隴雁半驚天在水征人相顧月如霜之類是也

李邯鄲

李邯鄲公作詩格句自三字至九字有五字成篇者盡古今詩之格律足以資詳博不可不知也伯父娶邯鄲孫女嘗聞邯鄲公與小宋飲酒咏一物隸僻事以多者為勝飲不勝者他人莫敢造席

張文定

張司空齊賢致仕歸洛康寧福壽先得裴晉公午橋莊鑿渠周堂花竹照日與故舊乘小舟攜酒游釣勝於門

曰老夫已毀裂冠冕或公綬垂訪不敢拜見造一卧榻
舉以視田稼醉則憇於木陰酒醒則起嘗作詩戲贈故
人午橋今得晉公廬花木烟雲興有餘師亮白頭心已
足四登兩府九尚書公慕唐李文亮為人對上前申明
律意惟務裁減又奏乞罷三班吏杖罰請從贖論皆可知

見玉壺
清話

王化基

王化基言任中丞日鞠祖吉知晉州受賕事敗詢其土

豪王基者云吾小民見州將貧乏相醵率為一日之壽
豈知其犯法哉悵歎不已化基詰其前後郡守王基言
三十年以來唯梁都官不受一錢餘無免者乃梁勗也
勗漢乾祐中司徒調下進士及第有文詞太祖欲令知
制誥為時宰所忌遂止化基言於太宗時勗以老病不
任吏事特授華州行軍司馬給郎中俸料其子昭璉亦
舉進士得杭州從事化基送以詩曰文章換貴雙枝秀
清白傳家兩地貧人多傳誦

見文公
談苑

王嗣宗

种放以處士名見拜官真宗待以殊禮名動海內後謁
歸終南山恃恩驕倨甚王嗣宗時知長安放至通判以
下羣拜謁放小俛垂首接之而已嗣宗內不平故名其
諸姓出拜嗣宗嗣宗坐受之放怒嗣宗曰向者通判以
下拜君扶之而已此百十耳嗣宗狀元及第名位不輕
胡為不得坐受其拜放曰以手搏得狀元耳何足道哉
嗣宗怒遂上疏言放實空疎才識無以踰人專飾詐功

蹈虛名陛下尊禮放擢為顯官誠恐天下竊笑益長澆
偽之風且陛下召魏野閉門避匿而放陰結權貴以自
薦達因扶闕放闕事數條上雖兩不之問而待放之
意寢衰齊州進士李冠嘗獻嗣宗詩曰終南處士聲名
滅邠土妖狐窟穴空

張乖崖

張忠定公詠布衣希夷先生一見奇之公曰願分華山
一半居之可乎先生曰於公固可及別贈以毫褚公曰是

將嬰我以世務也後公顯貴果以名德重天下將赴劍
南以詩寄先生曰性愚不肯林泉住剛要清流擬致君
今日星馳劍南去回頭慚愧華山雲及還又寄以詩曰
世人大抵重官榮見我東歸夾道迎應被華山高士笑
天真喪盡得虛名

見澠水燕談

聲隅子

黃晞閩人好讀書客遊京師數十年不歸高文苦學貧而
有守衣不蔽體得錢輒買書所費殆數百緡自號聲隅

子石守道為直講聞其名使諸生如古禮執羔雁東帛就里中聘之以補學職晞固辭不就故歐陽永叔哭徂徠先生詩云羔雁聘黃晞晞驚走隣家是也著書甚多在至和中薦於朝除試太醫助教月餘未及闕綠袍遇疾暴卒有子甚愚魯所聚及自著書皆散失無存者見涑水記聞

王沂公

王沂公為布衣時以所業贄呂文穆蒙正中有早梅詩

其警句云雪中未論和羹事且向百花頭上開文穆云
此生登第已安排作狀元宰相矣已而果然

見魏王
語錄

僧有明

浮圖詩者不少士大夫莫為汲引多汨沒不顯嘗仕福
州見山僧有明有詩百餘首其中佳句如虹收千嶂雨
潮展半江天詩因試客分題僻碁為饒人下著低不減
唐人

花蕊夫人

孟蜀時花蒞夫人能為詩而世不傳其歌詞清婉可聽
他日王平甫治館中廢書得其七言詩一卷題云八十
九首而存者纔三十餘篇大約似王建宮詞一篇云厨
船進食簇時新列坐無非侍從臣日午殿頭宣索膾隔
花催喚打魚人又云月頭支給買花錢滿殿宮娥近數
千遇著唱名多不語含羞急過御床前他篇類此

楊玠

楊玠靖恭虞卿之曾孫也仕前偽蜀王建至顯官隨王

衍歸後唐以老得工部尚書致仕居長安舊居多為隣
里侵占子弟欲詣府訴其事以狀白玢玢批紙尾云四
隣侵我我從伊畢竟須思未有時試上含元殿基望秋
風秋草正離離子弟不復敢言

孫僅

孫何孫僅俱以能文馳名一時僅為陝西轉運使作驪
山詩二首其後篇有云秦帝墓成陳勝起明皇宮就祿
山來時方建玉清昭應宮有惡僅者欲中傷之因錄其

詩以進真宗讀前篇云朱衣吏引上驪山遽曰僅小器也此何足誇遂棄不讀而陳勝祿山之語卒不得聞人以為幸也

見廬陵居士錄

王禹玉

京師祭二社多差近臣王禹玉在兩禁二十年熙寧三年為翰林承旨又膺是任題詩齋宮曰隣雞未動曉驂催又向靈壇飲福盃自笑治顰不知足明年強健更重來執政聞而憐之

見倦遊雜錄

陳烈先生

陳烈先生初嘗與蔡君謨同硯席時君謨出鎮福州東
吏治民毫髮不容一日烈往見之維舟城下聞其嚴察
不往謁之但留詩於庭曰溪山龍虎蟠溪水鼓角喧中
宵卿雲破六月夜衾寒風雨生殘樹蛟螭喜怒瀾慙慙
祝舟子移棹過前灘亭吏不敢隱錄詩呈公自是公為
之少霽威稜

事實類苑卷三十七

欽定四庫全書

事實類苑卷三十八

宋 江少虞 撰

詩歌賦詠

真宗親選兩制館閣送劉總詩

樞密直學士劉總出鎮并門兩制館閣皆以詩寵其行因
進呈真宗深究詩雅方競務西崑體磔裂雕篆親以御
筆選其平淡者止得八聯晁迥云夙駕都門曉微涼苑
樹秋楊億止選斷句云關榆漸落邊鴻度誰勸劉郎潤

十分朱巽云寒垣古木含秋色祖帳行塵起夕陽李維
云秋聲如暮角膏雨逐行軒孫僅云汾水冷光搖畫戟
蒙山秋色鎮層樓錢惟演云置酒軍前樂聞笳塞上清
都尉王貽永云河朔雪深思愛日并州春暖詠甘棠劉
筠云極目關山高倚漢順風鵬鷺遠凌秋上謂總曰并
門在唐世將相出鎮凡闕遣從事者以題詠述寵行之
句多寫佛宮道宇纂集成編目曰太原事迹後不聞其
作也總後寫御選句圖立於晉祠

於越亭詩

公言咸平初罷處州赴闕道經饒州餘闕登於越亭前
瞰琵琶州後鎮思禪寺林麓岑鬱千峯競秀真天下絕
境古今留詩者百餘篇張佑云扁舟亭下駐烟波十五
年遊重此過洲嘴露沙人渡淺巖梢藏竹馬蹄多層瀾
漲水痕猶在古板題詩字已訛況是高秋正圓月可堪
聞聽異鄉歌劉長卿云天南愁望絕亭下柳條新落日
獨啼鳥孤舟何處人生涯投越嶠世業陷邊塵草色迷

征路鶯聲傍楚臣秦臺愁白首楚渚怨青蘋杳杳鍾陵
暮悠悠鄱水春獨醒翻取笑直道不容身得罪風霜古
全生天地仁青山數行淚滄海一窮鱗流落機心盡空
憐鷗鶴親三篇絕唱也

雍熙以來文士詩

公自言雍熙初歸輒迄今三十年所聞文士多矣真能
詩者甚鮮如

闕

者夙擅盛名而徐鉉梁周翰黃夷簡

范杲皆前輩鄭文寶薛映王禹偁吳俶劉師道李宗諤

李建中李維姚鉉陳堯佐悉當儕流後來之著名者如
路振錢熙丁謂錢易梅詢李挺蘇為朱巖陳越王曾李
堪陳談呂夷簡宋綬邵煥晏殊江任焦宗古布衣有錢
塘林逋縉雲周啓明錢氏諸子有封守惟濟供奉官昭
度鄉曲有今南鄭殿丞兄故黎州家君極高安薄覽宗
人字收之子並有佳句不以擯舉而錢惟演劉筠特工
於詩其警策殆不可遽數自兵部而下公之所嘗舉今
略記之兵部春望杳杳煙蕪何處盡搖搖風柳不勝垂

徐鉉遊水蘭亭云蘭烟破浪城陰直玉勒穿花苑樹深
習水戰云千帆雨助陰山勢萬里風馳下瀨聲病中題
云向空咄咄煩書字舉世滔滔莫問津謫居云野日蒼
茫悲遠舍水風陰慘濕貂裘陳秘監歸泉州云三朝恩
澤馮唐老萬里江關賀監歸宿山寺云落宿依樓角歸
雲擁殿廊梁周翰應制云百花將盡牡丹拆十雨初晴
太液春黃夷簡題人山居云宿雨一番蔬甲拆春山幾
焙茗旗香范杲頌聖云千里版圖來浙右一聲金鼓下

河東鄭文寶春郊云百草千花路微風細雨天重經貶
所云過關已躍檣蒲馬誤喘猶驚顧兔屏洛城云星沈
會節歌鍾早天近斜陽烟樹微張靈州云越絕曉城蝴蝶
夢單于秋引盡龍聲長安送別云杜曲花光濃似酒灞
陵春色老於人送人歸湘中云滿帆西日催行客一夜
東風落楚梅南行云失意慣中遷客酒多年不見侍臣
花悽靈云舊井霜風仙界橘雙溪晴落海邊鷗送人知
韶州云人辭碧落春風晚花老朱陵古渡頭水熙陵云

承露氣清駒送日
觚稜人靜鳥呼風
邊上云鬢須相似
雪峰外寂寥烟薛
映送人鄂州云黃
鵠晨霞傍樓起頭
陀秋草繞碑荒吳
淑送朱致政云洛
殿夜涼初閣筆渚
宮歲晚得懸車劉
師道寄別云南浦
未傷春草碧北山
仍愧曉猿驚與張
祕云久師金馬客
就敵玉溪生荷花
云有路期奔月無
媒與嫁春殘花云
金谷路塵埋國艷
武陵溪水泛天香
寄陳龍圖云城瞻
北斗天何遠夢斷
南柯日未沈歎世
云野馬飛颺日醺
雞舞甃天春雪云

青帝翠華沈物外素娥孀影吊雲端又雪云三千世界
銀沈色十二樓臺玉作層相中云凌波帝子魂何在芳
草王孫怨未歸李宗諤春郊云一溪脆綠浮灘鵜萬樹
春紅叫杜鵑蘇承旨云金鑾後記人爭寫玉署新牌帝
自書李建中送人云山程授館聞鴻夜水國還家欲雪
天李維渚宮亭云故宮芳草在往事暮江流朱致政云
清朝解組猶強健白首還鄉正太平和人贈馬太保云
轉盼回巖電分鬚磔蝟毛寄洪湛云謫去賈生身健否

秋來潘岳鬢斑無姚鉉錢塘郡云疎鐘天竺曉一雁海
門秋陳堯佐潮州徵還云君恩來萬里客路出千山送
种放云風樵若耶路霜橘洞庭秋送朱荆南云部吏百
函通爵里從兵千騎屬韃橐錢熙送人金陵拜掃云鶴
歸已改新城郭牛卧重尋舊墓田丁謂和錢易云珊瑚
新筆案雲母舊屏風送章南安云楊花過嶺路桃葉渡
江船章明州云泣珠泉客通關市種玉仙翁寄版圖陳
荆南云楚客夢雲鈴閣密郢人歌雪射堂開錢易畫景

云雙峰上簾額獨鵲下庭柯芭蕉云綠章封奏緘初啟
青鳳來王尾乍開梅詢陰陵云千重漢園合一夜楚歌
聲李拱春題村舍云犬眠花影地牛牧水聲坡蘇為湖
亭云春波何限綠白鳥自由飛劉端州云夜浪珠還浦
春泥象印蹤宋嚴贈徐常侍云寓直有誰同騎省立班
獨自戴貂冠陳越侍宴云千鍾人既醉九奏鳳來儀與
劉從云誰憐松下韻不廢洛中吟李秦州云擁路東方
騎懸腰左顧龜王曾李駙馬拜陵云人畏軒臺久春歸

雨澤多李堪哭黎州家君云桐鄉留語葬泉路在生悲
周建州云海月隨帆落溪花繞驛流送人云雷風有約
春蚪振霜雪無情紫蕙枯退居云雨密綠桐潤潮平釣
石沈陳談閒居云籠雞對窓語庭雀繞門飛呂夷簡春
早云梅無驛使飄零盡草怨王孫取次生九日呈梅集
仙云人歸北闕知何日菊應東籬自去年寒食云人為
介推初禁火花愁青女再飛霜宋綬送人知江陵云奇
才劍客當前隊麗賦騷人託後車送人洪州云江涵帝

子雲飛閣山際真君鶴馭天周賢良云楚澤傷春落鵝
鵝長安索米愧侏儒邵煥送晏集南歸云官船風破浪
闕吏鼓通晨晏殊與張臨川云籬邊菊秀先生醉桑下
雛嬌稚子仁又云東陽詩骨秀南浦別魂消章明州云
騷客江山知有助秦源雞犬更相關送人洪州云射斗
氣沈龍已化置芻人去榻猶懸江任送人云珠盤臨路
泣斗印入鄉提焦宗古送人遊蜀云芳樹高低啼蜀魄
朝雲濃淡極巴天贈周玄良云南陽客自稱龍卧東魯

人應歎鳳哀林逋湖山云片月通蘿徑幽雲在石床周
啟明近臣疾愈云一九童子藥五返使人車皇甫提刑
云鵠夷江上湖田稔牛斗星邊貫索空錢惟濟太乙宮
醮云庭下焚香連宿霧林間鳴珮起棲鸞從駕西巡云
曉陌壺漿滿春風騎吹長故主第云鳳簫通碧落星石
辨靈源錢昭度村居云黃蜂衙退海潮落白蟻戰酣山雨
來大寒云雨被北風雖作雪水愁東海亦成冰金陵云
西北高樓在東南王氣銷梅花云東北風吹大庾嶺西

南日映小寒天雁云三年別館風吹雪萬里長沙月照
來秋日華山云人間路到三峰盡天下秋隨一葉來又
鄭殿丞云青鳥幾傳王母信白鷺曾換右軍書將至京
云近闕已瞻龍虎氣思鄉猶望斗牛星家君黎州赦至
云山川百蠻國雨露九天書寄遠云吳越自為迢遞國
參商元是別離星自遣云天上羲輪都易失人間堯厯
自難逢哭諸屯田云部中車雨春無潤水上郎星夜殞
光感懷云頓纓狂走鹿煦沫倦游鱗心知云速客苦驚

雲聚散相逢多倍月虧盈自詠云剛腸欺竹葉衰鬢怯
菱花淚云一斑早寄湘川竹萬點空遺峴首碑春晝云
人歸漢后黃金屋燕在盧家白玉堂寄鱗云世味嫌為
枳時光怨落莫閒居云歌懷飯牛起書憤抱麟成蟬云
二子自不食三閭何獨清登樓云遠水淨林色微雲生
夕陽詠塵云已傷花榻滿休妬畫梁飛凡公之所舉者
甚多值公病心煩不喜人申問今聊記其十之一二耳

錢惟演劉筠警句

近年錢惟演劉筠首變詩格學者爭慕之得其標格者
蔚為佳詠二君麗句絕多如惟演奉使塗中云雪意未
成雲著地秋聲不斷雁連天又云客亭厭見名長短村
酒那能辨聖賢送僧遊楚云宿舍孤烟起行衣夢雨涼
張并州云戈矛巡霧夕鐘鼓宴花晨章衢州云平檻晚
波吳舫渡遶城春樹越禽飛章南安云離人南浦多春
草越鳥棲枝有早梅劉潭州云坐激鮮飈湘竹晚樹寒
涼雨越禽歸李太僕北使云漢月隨移帳燕鴻伴解鞍

何袁州云疏鐘靜起軍城晚華表雙高水國秋陳江陵
云深沈珠網通歸夢紫翠春山接去舟太一宮云神庭
古栢啼鳥起齋室虛簾宿霧通送人云思滿離堂酒魂
驚客舍烏高泉州云東南一尉宵烽息西北高風晚望
迷章分亭云小雨郊原連苦霧夕陽樓閣照丹楓東封
應制云羽毛相野駕宴喜魯郊民送余之處州云輕颺
使車遠明月直廬空張僕射判河陽云綠野桑麻連泗
水黃鍾歌吹擁千兵孫永興云魚尾故宮迷草樹龍鱗

平隰自風烟漢武云五侯東溟邀鶴駕幾窮西極待龍
媒公子云歌翻南國桃根曲馬過章臺杏葉鶉糧花云
欲作飛烟散猶憐返照遲荷花云淚有鮫人見魂須宋
玉招禁中鶴云天淵風雨多秋思遼海烟波失舊期無
題云有時盤馬看遊懶盡日投壺笑未回又曰春瘦已
寬連理帶夜長誰有辟寒金元夜云九枝火樹連金闕
萬里霜輪上壁璫馬延州云沃野桑麻涵細雨嚴城鼓
角送殘陽劉筠禁直云雨勢宮城濶秋城禁樹多陝州

從事云角迴含商氣橋長斷落塵周賢云崎嶇一乘傳
憔悴五羊皮章南鄭云甲士氣豪傳漢俗丙魚味美敵
吳鄉李太僕北使云望月卿曹重占星使者賢送僧云
卷袖齋鐘斷搢筇嶽雨餘僧崇惠云醉令難同社仙鷺
好換書葉金華云柔柔蔽野鳴雛雉高柳含風變早蟬
劉潭州云前席久虛溫室樹心旌無奈楚風長又云沙
禽兩兩穿鈴閣江草依依接射堂章九隴云溪牋未破
水生硯爐酒新燒雷滿天又周賢良云春風亂鶯轉夕

霧一鴻冥張嶺南云山月愁揮子風濤怒鱣魚西巡云
龍駕昌明御天旗水一神張婺州云大野幾星分婺女
清風萬古感顏烏章南安云嶺雲夏變梅蒸早越賈秋
藏桂蠹多西京首坐云縈河帶遶中天濶碧落星懸大
士居題雪云劉伶醉席梅花地海客仙槎粉水天利州
轉運云鷗蹲野芋難為食雪積鹽泉久置宮章分寧云
鶴伴鳴琴聽事晚鳥驚調角武城秋處州云朱節兩輻
巡屬邑月留雙筆在中臺閣宿云二讓月臨承露掌九

雛烏遶守宮槐又云酒供硯滴濡毫冷太守更籌沃漏
長雪闕云已回隣面三年粉又結寒蠶幾繭冰汾陽道

中云鼓音

闕

繩遠舞節鳴鸞玉步遲楊洪州云桃葉

橫波人共醉劍光射斗嶽常空李秦州云右城獨登溫
樹密前旗雙抗嶺雲南劉潭州云洛田荒二頃楚浪漲
三篙槿花云吳言何薄命楚夢不終朝宮詞云難銷守
宮血易斷舞鸞腸又云虹跨層樓繞螢飛下苑涼夏日
云雲容倏變千峰險草色相沿百帶長新蟬云翼薄乍

舒宮女鬢蛻輕全解羽人尸公子云行庖爨蠟雕胡熟
求埒鋪金汗血驕明皇云梨園法部兼胡部玉輦長亭
更短亭荷花云湔裙無限水障袂幾多風別墅云雲際
尋撞技花間笑壁樓無題云荷心出水終無定羅蔓從
風莫自持又云藻井風高蛛壞網杏梁春暖燕爭泥詠
梨云先時櫻熟煩羊酪信遠梅酸損瓠犀洞户云密鑠
香雲深處戶亂飄梨雪晚來天贈希聿云吟餘雪散葉話
久塵遺毛夕陽云塞迴橫烟紫江清照葉丹閨中云籠

禽思隴樹洞犬識秦人柳絮云平沙萬里經春雪廣陌
三條盡日風屬疾云簾鳴風笑厨烟絕月樹烏驚藥杵
喧燈夕云金吾抱箭催壺水玉宇來風滿砌莫禁中云
萬年宮省樹五色帝家禽其警句絕多此但所記者耳

近世釋子詩

公嘗言近世釋子多工於詩而楚僧惠崇蜀僧希盡為
傑出其江南僧元淨夢闕浙右僧寶通守恭行筆鑒微
簡長尚能智仁休復蜀僧惟鳳皆有佳句惠崇贈裴太

守云行縣山迎舸論兵雲繞旗高生山閣坐云對語淮
潮起題詩楚月新周達州云鎖城山月上鳴角海鷗驚
東林寺云鳥歸松墮雪僧定石沈雲光梵師云梵容存
古像唐語入新詩明大師云門掩前朝樹心懸別郡峰
送李堪云秋聲動羣木暮色起千山希盡雁蕩山云來
書逢歲晚去夢歷峰危廣南陳轉運云春生桂嶺外人
在海門西僧東歸詩云帆影隨寒雁經聲隱暮潮宋承
旨林亭云雪溜懸危石碁燈射遠林贈僧云漱齒水溪

遠開禪雪屋深送人云玉繩天濶遠金折海

闕

句學

士云曉天金馬路晚歲石霜心寄人云山日秋光短江
虹晚影低新津尉云劍月啼猿苦江沙濯錦寒北宮書
亭云花露盈蟲穴梁塵落燕泥登上人云寄禪關樹老
乞食塞城荒僧歸新安云風泉舊聽僧窓改雲穴曾行
鳥徑殘春山云芳樹尋雲老孤泉落石危送人歸南海
云落日橫秋島寒濤兀夜船寶通題相國寺云下朝人
帶天香入出定僧迎御仗來守恭佛迹峰云布髮人來

絕銜花鹿去多朝海峰云影落陽侯宅高連覺帝居行
肇送僧云聽錫樵停斧窺禪客立門送人之鄞江云江
深鰲背出帆影斗邊飛簡長送人歸寧云烟壘沈寒角
霜空擊怒鵬尚能送僧歸浙右云霜州楓落冷水館月
生寒送僧歸四明云古寺山光滿重城海氣遙送人云
西風隨雁急寒柳向人疎孫大諫知永興軍云關河虎符
重殿閣獸鐸閒智仁溪居云寒聲病葉落曉色凍雲開
僧歸天台云路遙無去伴山疊有啼猿冬夕云風窓燈

易滅雪屋夜偏長休復送道士西遊云日暮長安道秋
深太白峰惟鳳秋日送人云去路正黃葉別君堪白頭
哭度禪師云海客傳遺偈林僧寫病容皆公之所舉畧
記之云爾公又言應集當代名公詩為筆談時有下江
吳僧聞之競以詩為贄擇其善者多寫入筆談中

唱和聯句

唱和聯句之起其源遠矣自舜作歌皋陶颺言賡載及
栢梁聯句顏延年有和謝監玄暉有和伏武昌登孫權

故城等篇梁何遜集中多聯句至唐朝文士唱和聯句
固多元稹作春深題二十篇並用家花車斜四字為韻
白居易劉禹錫和之亦同此四句令狐楚所和詩多次
韻起於此凡聯句或兩句四句亦有對一句者謂之輓

輓體

見楊文
公談苑

李白詞

平林漠漠烟如織寒山一帶傷心碧暝色入高樓有人
樓上愁玉階空佇立宿鳥歸飛急何處是歸程長亭連

短亭此詞不知何人寫在鼎州滄水驛樓復不知何人所撰魏道輔泰見而愛之後至長沙得古集於子宣內翰家乃知李白所撰

杜工部詩

陳舍從易當時文方盛之際獨以醇儒古學見稱其詩多類白樂天蓋自楊劉唱和西崑集行後進學者爭效之風雅之變謂之崑體由是唐時諸詩集幾廢而不行陳公時偶得杜集舊本文多脫誤至送蔡都尉詩云身

輕一鳥其下脫一字陳公因與數客各拈一字補之或云疾或云落或云趲下莫能定其後得一善本乃是身輕一鳥過陳公歎服以為雖一字諸君亦莫到也

九僧詩

國朝浮圖以詩名於世者九人故時有集號九僧詩今不復傳矣余少時聞人多稱其一曰惠崇餘八人者忘其名字也余亦略記其詩有云馬放降來地鵬盤戰後雲又云春生桂嶺外人在海門西其佳句多類此其集

已亡今人多不知其所謂九僧者矣是可歎也

周朴詩

唐之晚年詩人無復李杜豪放之格然亦務以精意相
高如周朴者措思尤艱每有所得必極雕琢故時稱其
詩曰鍛鍊雖未及成篇已播人口其名重當時如此而
今不復傳矣余少時猶見其集其句有云風煖鳥聲碎
日高花影重又云晚來山鳥鬧雨過杏花稀誠佳句也

評梅蘓二家詩

聖俞子美齊名於一時而二家詩體特異子美筆力豪肆以超邁橫絕為奇聖俞覃思精微以深遠閒淡為意各極其長雖善論者不能優劣也余嘗於水谷夜行詩略道其一二云子美氣方雄萬竅號一意有時肆顛狂醉墨灑滂霈譬如千里馬已發不可殺盈牋盡珠璣一難揀汰梅翁事清切石齒漱寒瀨作詩三十年視我猶後輩文辭愈精新心意雖老大有如妖嬈女老自有餘態近詩尤苦硬咀嚼且難噉又如食橄欖真味久愈在

蘇豪亦氣轢舉世侵驚駭梅窮獨我知古貨今難賣語
雖指二子謂粗然不能優劣之也



事實類苑卷三十八

欽定四庫全書

子部
事實類苑卷三十九至
四十一

詳校官編修_臣周璿

員外郎_臣牛稔文覆勘

總校官中書_臣朱鈐

校對官中書_臣袁文邵

謄錄監生_臣李逢堯

欽定四庫全書

事實類苑卷三十九

宋 江少虞 撰

詩歌賦詠

王建宮詞

王建宮詞一百首多言宮禁中事皆史傳小說所不載者往往見於其詩如內中數日無呼喚搦得滕王蛺蝶圖滕王元嬰高祖子新舊唐書皆不著其技能惟名畫錄畧言其善畫亦不云其工蛺蝶也惟見於建詩耳或

謂今人家亦有得其圖者唐世一藝之善如公孫大娘
舞劍器若曹剛琵琶米嘉榮歌皆見於唐賢詩句遂知
名于世當時山林田畝潛德隱行君子不聞於世者多
矣而賤工末藝得所附託乃垂於不朽蓋各有幸有不
幸焉

錢文僖鄭工部題詠

西洛故都荒臺廢沼遺迹依然見於詩者多矣惟文僖
公一聯最為警絕云日上故陵烟漠漠春歸空苑水潺潺

潺裴晉公綠野堂在午橋南時適張僕射齊賢家僕射
罷相歸終日與賓客吟宴於其間惟鄭工部文寶一聯
最為警絕云水煖鳬鷗行哺子溪深桃李卧開花人謂
不減王維杜甫也錢公好句尤多而鄭句不惟當時人
莫及而其集中能及者亦少

韓吏部

退之筆力無施不可而嘗以詩為文章末事故其詩曰
多情怯酒伴余豈作詩人然其資談笑工諧謔叙人情

狀物態一寓於詩而曲盡其妙此在雄文大手故不足
論而予獨愛其工於用韻也蓋其得韻寬則波瀾橫溢
泛入旁韻乍還乍離出入回合殆不可拘以常格如此日
足可惜之類是也得韻窄則不復旁出而因難見巧愈
嶮愈奇如病中贈張十八之類是也余因與聖俞論此以
為譬夫善馭良馬者通衢康陌縱橫馳逐惟意所之至
於水曲蟻封疾徐中節而不差跌乃天下之至工也聖俞
戲曰前史言退之為人本強若寬韻可自足而輒旁出窄

韻難獨用而反不出豈非其拗強而然歟坐客皆笑之也

白雲樓

郢州白雲樓素多題詠一日郡守倅燕集是樓方命坐客賦詩劉水傳賓以心恙羈置是郡不得預會遂使人持誦以獻才致蕭散盡江山之勝一座為之閣筆詩曰江上樓高十二梯登臨偏與白雲齊人從別浦經時去天向平蕪儘眼低寒色不堪長黯黯秋光無奈更淒淒

欄杆曲盡愁無盡水正東流日正西

華清宮

臨潼縣靈泉觀即唐之華清宮也自唐迄今題詠者不可勝紀自老杜五言長韻并三絕洎鄭嵎津陽門詩外少得佳者本朝張文定陳文惠洎前進士楊正倫雖非綺靡而義理可取文定詩曰當時不是不窮奢或樂昇平少歎嗟姚宋未亡妃子在塵埃那得到中華文惠詩曰百首新詩百意精不尤妃子即尤兵爭如一句傷前

事都為明皇恃太平正倫詩曰休罪明皇與貴妃大都
衰盛兩隨時惟憐一派溫泉水不逐人心冷煖移又鄭
文寶詩只見開元無事久不知貞觀用功深皆為知音
所賞

酒帘

王逵以祠部員外郎知福州尚氣自矜福州有當壚老
媼常釀美酒士人多飲其家有舉子謂曰吾能與媼致
數千媼信乎媼曰倘能之敢不奉教因俾媼市布為一

酒帘題其上曰下臨廣陌三條濶斜倚危樓百尺高太守若出喝道者必令媼卸酒帘但佯若不聞俟太守行馬至帘下即出卸之如見責稽緩即推以事故謝罪而已必問酒帘上詩句何人題寫但云某嘗聞飲酒者好誦此二句言是酒望子詩媼遂丐善書者題於酒帘上適王經此對如其言大喜媼至府與錢五千酒一斗曰賜汝作酒本詩乃王詠酒旗詩生平最為得意者

相思河

鄜州東百里有水名相思河岸有郵置亦曰相思鋪令
狐挺題壁以詩曰誰把相思號此河塞垣車馬往來多
只應自古征人泪洒向空川作浪波

賡張文定詩

張齊賢嘗作詩自警兼遺子孫雖詞語樸質而事理切
當足為規戒其詩曰慎言渾不畏忍事亦何妨國法須
遵守人非莫舉揚無私仍克己直道更和光此個如端
的天應降吉祥余嘗廣其意就每句為一篇命曰八詠

警戒詩其一云慎言渾不畏言出患當隨須信樞機發
寧容駟馬追三緘事可見兩舌業當知口是起羞本憑
君且再思其二云忍事亦何妨勿令心火揚火揚猶可

滅心忿固多傷堪嘆波羅密

釋氏有忍辱波羅密

可憐歌利王

出金

剛從心更從刃字意可消詳其三云國法須遵守金科

盡詔條一毫如有犯三尺不相饒豈用誇奸黠何須恃
貴驕自然逢吉慶神理亦昭昭其四云人非莫舉揚萬
事且包荒殿上便猶掩車中吐不妨在他誠所短於己

有何長須是常規檢回頭自忖量其五云無私仍克己
克己以無私二事兼修飭終身在省私公清無歛怨高
亢易招危更切循謙退方應履坦夷其六曰直道更和
光雙修學乃章直須和輔助和賴直交相好直終多訐
偏和又少剛能和又能直行己自芬芳其七云此個如
端的除非六句修永為几杖誠更作子孫謀本立方生
道農勤乃有秋茲詩雖淺近至理可推求其八云天應
降吉祥天理本茫茫舒慘雖無定榮枯却有常益謙尤

効驗福善更昭彰籠絡無跡漏恢恢網四張

青箱雜記

題淮陰廟

淮陰侯廟題者甚多惟諫議錢公最為絕唱曰築壇拜
處恩雖厚躡足封時慮已深隆準若知同鳥喙將軍應
有五湖心

題歌風臺

徐州歌風臺題者甚多惟尚書張公方平最為絕唱曰
落魄劉郎作帝歸樽前一曲大風辭才如信越猶蒞醢

安用思他猛士為

題朝元閣

臨潼縣華清宮朝元閣題者亦多惟陳文惠公二韻為
絕唱曰朝元高閣迴秋臺無隱情浮雲忽已蔽不見漁
陽城

歌曲艷麗

文章純古不害其為邪文章艷麗亦不害其為正然世
或見人文章鋪陳仁義道德便謂之正人若言及花草

月露便謂之邪人茲亦不盡然也皮日休曰余嘗慕宋璟之為相疑其鐵腸石心不解吐婉媚詞及觀其文而有梅花賦清便富麗得南朝徐庾體然予觀近世所謂正人端士者亦皆有艷麗之詞如前世宋璟之比今並錄之如乖崖公張詠席上贈官奴小英歌曰天教搏百花作小英明如花住近桃花坊北面門庭掩映如仙家美人宜稱言不得龍腦薰衣香入骨維揚軟縠如雲英臺郡輕紗若蟬翼我疑天上婺女星之精偷入筵中名小英又

疑王母侍兒初失意謫向人間為飲妓不然何得膚如
紅玉初碾成眼似秋波雙臉橫舞態因風欲乘去歌聲
遏雲長且清有時歌罷下香砌幾人魂魄遙相驚人看
小英心已定我見小英心未足為我高歌送一盃我今
贈爾新翻曲

二

韓魏公晚年鎮北都一日病起作點絳唇小詞曰病起
恹恹畫堂花謝添憔悴亂紅飄砌滴盡胭脂淚惆悵前

春誰向花前醉愁無際武陵回睇人遠波空翠司馬溫
公亦嘗作阮郎歸小詞漁舟客易入春山仙家日月閒
綺窓紗幌映朱顏相逢醉夢間松露冷海霞殷匆匆整
棹還落花寂寂水潺潺重尋此路難又曹修古立朝最
號剛方蹇諤嘗見池上有所遇者亦作小詩寓意曰荷
葉罩芙蓉圓青映嫩紅佳人南陌上翠蓋立春風

詩人使酒樓語

王安國作詩多使酒樓語嘗語余曰楊文公詩有江南

一酒樓堤柳拂人頭李白題詩遍酒樓錢昭度詩亦有
一酒樓長憶錢塘江上路酒樓人散雨千絲令子詩有
幾酒樓余答曰吾詩有二酒樓安國曰足矣蓋余有題
九江琵琶亭小詩云夜泊潯陽宿酒樓琵琶亭畔荻花
秋雲沉鳥沒事已往月白風清江自流又余昔年嘗送
客西陵亦作小詩曰若耶溪畔醉秋風獵獵船旗照水
紅後夜錢塘酒樓上夢魂應遶浙江東

贈孫可久詩

仁宗朝內臣孫可久賦性恬淡年踰五十乞致仕都下有居第堂北有小園城南有別墅每良辰美景以小車載酒優游自適石曼卿長過其居題詩曰南北沾河潤幽深在禁城疊山資遠意讓俸買閒名閉戶斷蛛網折花移鳥聲誰人識高趣朝隱石渠生屯田員外郎柳永亦贈詩曰故侯幽隱百城東草木扶疎一畝宮曾珥貂璫為近侍却紆綈褐作閒翁高吟擁鼻詩懷壯雅論持衡道氣充厭盡繁華天上樂始將踪跡學冥鴻可久好

吟詠効白樂天格嘗為陝西駐泊為樂天造祠堂於郡城大阜之頂中安繪像仍繕寫平生歌詩鑒策之句徧於四墉晚年著歸休集行於世年七十餘卒

肯堂集

內臣裴愈字益之亦好吟詠真宗朝奉命江南搜訪遺書名畫歸奏稱旨用是累居三館授秘閣職任有詩送魯秀才南遊句云東吳山色家家月南楚江聲浦浦風又聞蟬詩云楊柳影疎秋霽雨梧桐葉墜夕陽天皆其

佳句有子曰湘字楚老亦有詩名明道中仁宗御便殿
試進士房心為明堂賦和氣致祥詩亦命湘賦之湘舞
蹈再拜數刻而成仁宗嗟賞左右中人為之動色其和
氣致祥詩曰君德承天道沖融協太和卿雲呈瑞早膏
澤應時多煦集連枝木嘉扶異穎禾五星還聚井丹鳳
更巢阿數澤無遺士邊方久息戈黔黎逢至化稽首拜
賡歌他詩亦多類此有肯堂集行於世翰林學士李公倣
為之作序曰予嘗嘉河東公父子起銀璫右貂能以屬

詞拔其倫益之三朝內侍老不廢學又課勵二子使皆有立約已慎履如周仁石慶而楚老孳孳嗜書克自淬琢云湘又善為小詞嘗任河東路走馬承受有詠并門浪淘沙小詞云鴈塞說并門郡枕西汾山形高下遠相吞十四樓臺依碧嶂烟景還分晉廟鎖溪雲簫鼓仍存牛羊斜日自歸村惟有古城木忝地前事消魂後有詠汴州浪淘沙小詞仁宗命錄進亦嘉之其詞曰萬國仰神京禮樂縱橫匆匆佳氣鎖龍城日御明堂天子聖朝

會簪纓九陌六街平萬物充盈青樓絃管酒如澠別有
隨堤烟柳暮千古含情

程文

五代之際天下剖裂我太祖啟運雖則下西川平嶺表
收江南而吳越荆閩歛籍歸覲然猶有河東未殄其後
太宗在駕乃始克之海內自此一統故因御試進士乃
以六合為家為賦題時進士王世則遽進卷有日照盡
乾坤作我之龍樓鳳閣開窮日月為君之玉戶金闕帝

覽之大悅遂擢為第一人

二

王沂公有物混成賦云不縮不盈賦象寧窮於廣狹匪
雕匪琢流形罔滯於盈虛則宰相陶鈞運用之意已見
於此賦矣又云用我之小者散而為草木得我之大者
聚而為山川則宰相擇任羣材使小大各得其所又見
於此賦矣

三

宋莒公兄弟平時分題課試莒公多屈於子京及作鵞
鳥不奴賦則子京遜兄遠甚莒公遂擅場賦曰天地始
肅我則振羽而獨來燕雀焉知我則凌雲而自至又曰
將翔將翔詎比海鷗之翼自南自北若專霜隼之誅則
公之特立獨行魁多士登宰相俱見於此矣

四

李度顯德中舉進士工詩有醉輕浮世事老重故鄉
人之句人多誦之王朴為樞密止以此一聯書於文

申炳知舉遂推為第三人人嘲云主司只選一聯詩見

玉

壺清
話

五

歐陽文忠公年十七隨州取解以落官韻不收天聖已
後文章多尚四六是時隨州試左氏失之誣論文忠論
之條列左氏之誣甚悉內有石言於晉神降于莘外蛇
聞而內蛇傷新鬼大而故鬼小雖被黜落而奇傑之句
大傳於時今集中無此論頃見連庠誦之耳

見東軒
筆錄

六

龐淳之初為舉人時趙文定作試官見其惟幾成天務賦云當羣形未屯已為造物之權大象賦形遂握上民之柄曰此必為宰相及為黃州司理夏英公見之亦以公輔稱焉後果為首輔

七

自唐以來試進士詩號省題近年能詩者亦時有佳句蜀人楊諤宣室受釐落句云願前明主席一問洛陽人

滕甫西旅來王云寒日邊聲斷春風塞草長博文漢都
護歸奉萬年觴諤有詩名題驪山云行人問宮殿耕者
得珠璣最為警策

文城縣名

江西洪郎中亶娶文城縣君李尚書公擇姊也治春秋
博學能文所作詩甚多公擇挽詩云久歷金門貴未酬
黃閣知如聞天祿客抱恨作銘詩不減前人

傳詩訛謬

唐人詩流傳訛謬有一詩傳為兩人者如漠漠水田飛
白鷺陰陰夏木轉黃鸝既曰王維又曰李嘉祐以全篇
考之摩詰詩也又楚鄉寒食梅花時野渡臨風駐采旗
草色連天人去住水紋如轂燕差池既見杜牧之集中
又見劉夢得外集作八句其末云朱幡尚憶羣飛雉青
綬初聯左顧龜非是湓城白司馬水曹何事與新詩考
其全篇夢得詩也然前四句絕類牧之

吏人詩

衛縣舊市易務壁間題字數行乃舊吏人詩也云罷樹
猿辭檻歸耕馬脫銜傭錢貧易舍官事老難擔亦意之

可取者

見李希聲詩話

老兒詩

唐路德延有孩兒詩五十韻盛傳于世近代洛中致仕
侍郎張公師錫追次其韻和成老兒詩亦五十韻今錄
之曰鬚髮盡皤然眉分白雪鮮週遮延客話偃僂抱孫
憐無病常供粥非寒亦衣綿負暄衾擁背借力杖齊肩

貌比三峰客年過四皓仙
喚方離枕上扶始到門前
每愛烹山茗常嫌釘石蓮
耳聾如塞續眼暗似籠烟
宴坐羸憑几乘時困掣鞭
頭搖如旋轉唇動若抽牽
骨冷愁離火牙疼怯漱泉
形骸將就木囊橐尚貪錢
膠睫乾眇綴粘髭冷涕懸
披裘腰嬾繫濯手袖慵揜
擡舉衣頻曳扶持藥屨煎
坐多茵易破行少履難穿
喜婢裁裙布嗔妻買粉鈿
房教深下幕床遣厚鋪氈
琴聽憐三樂圖張笑七賢
看經嫌字小敲磬喜聲圓
食罷羹沾杖盃餘酒

帶涎樂來須遣罷醫到久相延裹帽縱橫束梳頭取次
纏長吁思往事久感聽哀弦氣注腰還重風牽口更偏
墓松先遣種碑石預教鐫客到惟求藥僧來或問禪焙
茶懸竈壁曝艾曬簷椽怒僕輕掙眼嗔童謾握拳心驚
嫌蹴鞠脚軟怕鞦韆局縮同寒狄推僇似飽鳶觀瞻
目眩舉動屢頭旋女嫁取紅燭男婚乞綵箋已聞頌杖
几寧更佩韋絃賓客身非與兒孫事已傳養和屏作伴
如意拂相連久棄登山屐惟存負郭田呻吟朝不樂展

轉夜無眠呼稚臨床畔看書就枕邊冷疑懷貯水虛訝
耳聞蟬束帛非無分安車信有緣伏生甘坐未絳老讓
行先拘急將風夜昏沉欲雨天雞皮塵旋潰馬齒食頻
填每憶居郎署常思釣渭川喜逢迎佛會羞赴帶花筵
徑狹容移檻堦危索減塼好生焚鳥網惡殺拆魚船既
感桑榆日常嗟蒲柳年長思當弱冠悔不贖狂顛

呂公贈李公詩

李方公呂端公同踐文館後各登台輔呂公贈李公詩

曰憶昔僦居明德坊官資俱是校書郎青衫共直昭文館白首同登政事堂佐國廟謨君已展避賢榮路我猶妨主恩至重何時報老眼相看淚兩行

草陳恭公麻

陳恭公拜集賢殿大學士賈文元公昌朝當國張方平草麻有萬事不理賴胡廣之能言四夷未平藉陳平之達識賈公深惡之

評詩

沈括存中呂惠卿吉甫王存正仲李常公擇治平中
在館中談詩存中曰韓退之詩乃押韻之文耳雖健美
富贍而終不近古吉甫曰詩正當如是我謂有詩人以
來未有如退之也正仲是存中公擇是吉甫四人者交
相詰難久而不決公擇忽正色而謂正仲曰君子羣而
不黨君何黨存中也正仲勃然曰我所見如是耳顧豈
黨即以我偶同存中遂謂之黨然則君非吉甫之黨乎
一坐更大笑余每評詩亦多與存中合頃年常與王荆

公評詩余謂凡為詩當使挹之而源不窮咀之而味愈長至如歐陽永叔之詩才力敏邁句亦健美但恨其少餘味耳荆公曰不然如行人仰頭飛鳥驚之句亦可謂有味矣然余至今思之不見此句之佳亦竟莫曉荆公之意信乎所言之殊不可強同也

鸛雀樓

河中府鸛雀樓三層前瞻中條下瞰大河唐人留詩者甚多惟李益王之渙暢當三篇能狀其景李益曰鸛雀

樓西百尺牆江湖雲樹共茫茫漢家簫鼓隨流水魏國
山河半夕陽事去千年猶恨速愁來一日即為長風烟
併在思鄉處遠目非春亦自傷王之渙詩曰白日依山
盡黃河入海流欲窮千里目更上一層樓暢當詩曰迴
臨飛鳥上高出世塵間天勢圍平野河流入斷山

改王公詩

工部侍郎王公召試學士院王荆公為考官於簾下見
其試畢就壁間題字荆公使人錄之乃一詩也詩云古

木陰森白玉堂長年來此試文章日斜奏罷長楊賦閒
拂塵埃看畫牆荆公改奏罷長楊賦作奏賦長楊罷元
豐末荆公在金陵好事求書猶多寫此詩

事實類苑卷三十九

欽定四庫全書

事實類苑卷四十

宋 江少虞 撰

詩歌賦詠

沈存中論文

韓退之集中羅池神碑銘有春與猿吟兮秋與鶴飛今
驗石刻乃春與猿吟兮秋鶴與飛古人多用此格如楚
詞吉日兮時良又蕙肴蒸兮蘭藉奠桂酒兮椒漿蓋欲
相錯成文則語勢矯健耳杜子美詩紅稻啄餘鸚鵡粒

碧梧棲老鳳凰枝此亦語反而意全韓退之雪詩舞鏡
鸞窺沼行天馬度橋亦効此體然稍牽強不若前人之
語渾成也

二

唐人以詩學主人物故雖小詩莫不挺蹠極工而後
已所謂旬鍛月鍊者信非虛語小說崔護題城南詩
其始曰去年今日此門中人面桃花相映紅人面不
知何處去桃花依舊笑春風後以其意未全語未工

改第三句曰人面祇今何處在至今所傳此兩本唯
本事詩作祇今何處在唐人工詩大率多如此雖有
兩今字不惜也取語意為主耳後人以其有兩今字只
行多前篇

三

小律詩雖末技工之不造微不足以名家故唐人皆盡
一生之業為之至於字字皆鍊得之甚難但患觀者減
裂則不見其工故不惟為之難知音亦鮮設有苦心得

之者未必為人所知若字字皆是無有瑕疵語音亦掇麗但細論無功景意縱全一讀便盡更無可諷味此類最易為人激賞乃詩之折楊黃華也譬若三館楷書作字不可謂不精不麗求其佳處到死無一筆此病最難為醫也

四

晚唐士人專以小詩著名而讀書滅裂如白樂天座隅詩云俱化為餓莩作字押韻杜牧之秋娘詩云饜飫

不能飴飴乃錫耳若作飲食當音飴又陸龜蒙作藥名詩云鳥啄蠹根回乃是鳥啄非鳥啄也又斷續玉琴哀樂上有斷絃無斷續此類極多如杜牧阿房宮賦誤用龍見而霄事宇文時解斯椿已有此謬蓋牧未嘗讀周隋書也

五

古人文章自應律度不以音韻為主自沈約增崇韻學其論文則曰欲使宮羽相變低昂殊節若前有浮聲則

後須切響一簡之內音韻盡殊兩句之中輕重悉異妙
達此旨始可言文自後浮巧之語體制漸多如旁犯蹉
對假對雙聲疊韻之類詩又有正格偏格類例極多故
有三十四格十九圖四聲八病之類今畧舉數事如徐
陵云陪遊馭娑騁纖腰於結風長樂鴛鴦奏後聲於度
曲又云厭長樂之踈鍾勞中宮之緩箭雖兩長樂意義
不同不為重複此類為旁犯如九歌蕙肴蒸兮蘭藉奠
桂酒兮椒漿當以蒸蕙肴對奠桂酒今倒用之謂之蹉

對如自朱耶之狼狽致赤子之流離不唯朱對赤耶對
子兼狼狽流離乃獸名對鳥名又如廚人具雞黍穉子
摘楊梅以雞對楊如此之類皆為假對如幾家村草裡
吹唱隔江聞幾家村草對吹唱隔江皆雙聲如月影侵
簷冷江光逼履清侵簷逼履皆疊韻詩第二字側入謂
之正格如鳳曆軒轅紀龍飛四十春之類第二字平入
謂之偏格如四更山吐月殘夜水明樓之類唐名賢輩
詩多用正格如杜甫律詩用偏格者十無一二

香奩集

和魯公凝有艷詞一編名香奩集凝後貴乃嫁其名為韓偓今世傳韓偓香奩集乃凝所為也凝生平著述分為演綸游藝孝弟疑獄香奩羸金六集自為游藝集序云予有香奩羸金二集不行於世凝在政府避議論諱其名又欲後人知故於游藝集序實之此凝之意也予在秀州其曾孫和惇家藏諸書皆魯公舊物末有印記

甚完

見筆談

大言賦

蘇易簡為學士承旨日太宗親書宋玉大言賦錫之易
簡因効玉亦作大言賦以獻曰皇帝書白龍箋作大言
賦賜玉堂易簡御筆煌煌雄辭洋洋瓌瑋博達不可備
詳詔易簡升殿躬指其理歎宋玉之奇怪也因伏而奏
言恨宋玉不與陛下同時帝曰噫何代無人耶卿為朕
言之易簡曰聖人興兮告成功登崑崙兮展升中地為
席兮饗祖宗天起籟兮調笙鏞日烏月兔耀文明麾龍

旗兮嚴武御也執北斗兮奠玄酒也削西華兮為石礪也迅雷三發山神呼也流電三激烽火舉也禮冊獻兮淳風還君百拜兮天神歡四時一周兮萬八千年太山夷兮溟海乾圓蓋空兮方輿穿君王之壽兮無窮焉殿上皆呼萬歲上覽之大喜又作小詩四句以褒之易簡

刻石於院內之壁

見楊文公談苑

漁家傲

范文正公守邊日作漁家傲數闋皆以塞下秋來為

首句頗述邊疆之勞苦歐陽公嘗呼為窮塞主之詞及
王尚書素出守平涼文忠亦作漁家傲一詞以送之其
斷章曰戰勝歸來飛捷奏傾賀酒玉階遙獻南山壽
顧謂王曰此真元帥事也

因詩起獄

苗振以列卿知明州熙寧中致仕歸鄞州多置田產又
自明州創材為堂舟載歸鄞時王達亦致仕作詩嘲振
曰田從汾上天生出堂自明州地駕來此句傳至京師

王荊公大怒即出御史王子韻使兩浙廉其事子韻又
言知杭州祖無擇亦有奸利之迹於是明州秀州各起
獄鞠治振與無擇貶斥熙寧以後數以謠言起獄皆自
遼詩為始也

鳳棲梧詞

蜀路泥溪驛天聖中有女郎盧氏者隨父往漢州作縣
自蜀歸題於驛舍之壁其序畧云登山臨水不廢於謳
吟易羽移商聊緣於羈思因成鳳棲梧曲一闋聊書於

壁後之君子覽之者無以婦人竊弄翰墨為罪詞曰蜀
道青天烟藹藹帝里繁華迢遞何時至回望錦川揮粉
淚鳳釵斜亸烏雲膩鈿帶雙垂金縷細玉佩珠璫露滴
寒如水從此渺然添遠意畫眉學得遙山翠

見倦遊錄

大小孤山

宋景文言大小孤山以孤獨為字有廟江壖乃為婦人
狀龍圖閣學士陳公簡夫留詩曰山稱孤獨字廟塑女
郎形過客雖知誤行人但乞靈時稱佳句

登吹臺詩

先生嘗言恩門王公終於太子少保七十後精力猶不

衰每天氣和暖必乘小駟從三四老蒼頭攜照袋

以照袋皮

為之四方有蓋其中可容中貯筆硯韻畧刀子礪石牋紙數十幅并

小樂器之類別置遊春盒隨事置酒炙三五人之具門

生在京者多侍行每出郊野遇有園亭及竹樹之處必

賞燕終日賦詩品小管色盡歡醉而歸吾忝左拾遺日

適暮春與同門生五六人從公登繁臺佛舍繁臺即梁

孝王吹臺也公是日飲酒賦詩甚歡抵夜方散嘗記得
公詩曰柳陰如露絮成堆又引門生上吹臺淑氣即隨
風雨去芳尊宜命管絃催謾誇列鼎鳴鐘貴寧免朝烏
夜兔推爛醉也須詩一首不能空放馬頭回其天才縱
逸風韻閒適皆此類也

王彥威詩

先公嘗言唐朝長安士大夫重內官而輕外任及兩制
尤為華貴故自從郎或從翰苑出領節制者皆以為失

意當方面者目為粗材自以張燕公有言愧無通材供

國麓使又薛許昌謝茶詩云麓官乞與真拋却曾有詩

情合得嘗東京明德門

今為乾元門

即唐時汴州宣武軍鼓

角樓至朱梁建都不遑改作因而號曰建國樓其上有

節度使王彥威詩今尚在彥威明于典禮仕貞元元和

間為太常博士累官至大寮其詩曰貔貅十萬擁

雄姿正是酬恩報國時沛水波濤喧鼓角隋堤楊

柳拂旌旗前驅紅旆關西將列坐青娥趙國姬為

報長安冠蓋道麓官到底是男兒即彥威麓官男
兒之言亦有恨爾其後至太祖重修官職不復存
矣

禪理詩

楊文公深達性理精悟禪觀捐館時作偈曰漚生復漚
滅二法本來齊要識真機處趙州東院西丞相王公隨
亦悟性理捐館時知河陽作偈曰畫堂燈欲滅彈指向
誰說去住本尋常春風掃殘雪是夕薨凌晨天大雪實

正月六日

二

曹司封修睦深達性理知邵武軍時嘗以竹簞贈僧仁
因作偈與之曰翠筠纖簞寄禪齋半夜秋從枕底來若
也此時人問道涼天捲却暑天開

三

張尚書方平尤達性理有人問祖師西來意張以偈答
之曰自從無始千千劫萬法本來無一法祖師來意我

不知一夜西風掃黃葉

四

陳文惠公亦悟性理嘗至一古寺作偈曰殿古寒爐空
流塵暗金碧獨坐了無人又得真消息

五

富文忠尤達性理熙寧中余守官洛下公時為守遺余
書託為訪荷澤諸禪師余因以偈戲之曰是身如幻泡
盡非真實相況茲紙上影妄外更生妄到岸不須船無

風休起浪唯當清淨觀妙法了亡象公答偈曰執相誠
非破相亦妄不執不破是名實相既又以手筆貺余曰
承以偈見警美則美矣理則未然所謂無可無不可者
畫亦得不畫亦得就其中觀像者為不得不觀像者所
得如何禪在什麼處以不以有無為礙者近乎道也思
之思之

見青箱
雜記

淵明詩

陶淵明意趣真若清淡之宗詩家視淵明猶孔門視伯

夷也其集屢經諸儒手校然有間來使篇世蓋未見獨

有唐時晁文元家二本有之詩云君從山中來一作南山早

晚發我目我屋一作家南窗下今生幾叢菊薔薇葉已抽

一作秋蘭氣當馥歸去來山中山中酒應熟李太

白潯陽感秋詩陶令歸去來田家酒應熟

詩有變態

薛許昌答書生贈詩百首其一首卷初如卷終譏其不能變態也大抵屑屑較量屬句平勻不免氣骨寒儉殊

不知詩家要當有情致抑揚高下使氣沉拔聳秀凌紙
又用事能破觚為負判剛成柔始為有功此昔人所謂
縛虎手也如蘇子美窮居和長安師業清有句云玉帳
夜寒兵似水茅齋春靜草如烟東坡嘗作詩天邊鴻雁
不易得便令作對隨家雞又有驅猛虎如羣羊曰真佳
話也

王蘇更相是非

王文公見東坡醉白堂記徐曰此非是韓白優劣論東

坡答之曰不若介甫度州學記乃學校策耳二公相誚
或如此然勝處未嘗不相傾慕元祐間東坡奉祠西嶽
一見公舊題楊柳鳴蜩綠暗荷花落日紅酣三十六陂
春水白頭想見江南炷目久之曰此老野狐精也見西清詩話

王蘇更相稱譽

元豐中王文公在金陵東坡自黃北遷日與公遊盡論
古昔文字間則俱味禪悅公歎息謂人曰不知更幾百

年方有如此人物東坡渡江至儀徵和遊蔣山詩巴陵
守王勝之盆城公亟取讀至峯多巧嶂日江遠欲浮天
乃撫几曰老夫平生作詩無此二句又在蔣山時以近
製示東坡云若積學分縞夜崇桃分炷晝自屈宋沒世
曠千餘年無復離騷句法乃今見之荆公曰非子瞻見
諛自負如此耳亦未嘗許俗子道子是時相見俗子掃
軌矣

目前之景吟不到

張天覺云遊魚幾隊子隨母啄木數聲雌喚雄古子通
云楊花入竹靜鳥影渡塘稀而歸來詩曰馬憶曾行處
連嘶渡晚河忽驚鄉樹出漸識路人多皆因目前之景
吟者多不到也

前輩務求博約

二宋俱為晏元獻門下士後雖甚貴顯為文必手抄寄
公懇求雕潤嘗見景文寄公書曰莒公兄赴鎮圃田同
遊西池作詩長楊獵罷寒熊吼太一波閒瑞鵠飛語意

警絕又作一聯云白雪久殘梁複道黃頭閒守漢樓船
仍注空字於閒字之旁批云二字未定更望指示晏公
書其尾曰空優於閒且見雖有船不御之意又字好語
健蓋前輩務求博約情實純至如此

太白傳神

李太白歷見司馬子微謝自然賀知章或以為可與神
遊八極之表或以為謫仙人其風神超邁英爽可知後
世詞人傳者多矣然吾於丹青見之俱不若少陵云落

月滿屋梁猶疑照顏色熟味之百世之下想見風采此
與李太白傳神詩也

集句

集句自國初猶未盛也至石曼卿人物開敏以文章為
戲然後大著嘗見手書下第偶成一生不得文章力欲
上青雲未有因聖主不勞千里召姮娥何惜一枝春鳳
凰詔下雖沾命豹虎叢中也立身啼得血流無用處著
朱騎馬是何人

乞食歌姬院

韓熙載仕江南每得俸給散後房歌姬熙載披衲持鉢
就諸姬乞食率以為常東坡以玉帶贈了元酬以衲裙坡
作詩謝曰病骨難堪玉帶圍鈍根仍落箭鋒機欲教乞
食歌姬院故與雲山舊衲衣江南野錄亦載韓事與此
小異

韓文公華山女詩

退之見神仙亦不伏云我能曲屈自世間安能從汝巢

神仙賦謝自然詩則曰童騃無所識作誰氏子詩則曰
不從而誅未晚耳惟華山女詩頗假借不知何以得此

堆垛死屍

魯道善用事若正爾填塞故實舊謂之點鬼簿今謂之
堆垛死屍如詠猩猩毛筆詩云平生幾兩履身後五車
書又云管城子無食肉相孔方兄有絕交書精妙隱密
不可加矣當以此語反三隅也

文章傳襲

司馬池文正公之父仁宗時待制作詩云冷於波水淡
於秋遠陌初窮見渡頭賴得丹青無盡處不成應遣一
生愁又黃魯直之父作大孤山詩云長江巨浪獨夫險
比干一片崔嵬心文公清夷剛正而作小詞云相見爭
如不見有情還似無情笙歌散後酒初醒深院月明人
靜魯直作詩用事押韻皆超妙出人意表蓋其傳襲文
章種性如此

見三居士詩話

用字音

詩人不以字害意古者用字簡而當亦不以字害句故
韻清濁隨時措意流在束薪中入張韻留晏汾陰西入
先韻直取意順而已唐人以律格自拘不復敢用唯居
易作詩疑易其音於語中如照地麒麟用信音麟袍雪
擺胡用鶻音杉紅欄三百九十橋用謹音十往往有之
晏丞相殊嘗評之曰詩人來語後當如此用字

用字意

晏丞相嘗問曾明仲云劉禹錫詩有灤西春水綾文生

此生字作何意明仲云作生育之生丞相曰非也作生熟之生語乃捷

西都詩

宋次道嘗為西都詩以野孤落對五鳳樓言野孤落唐

時名官所聚也

見劉貢父詩話

制科無登第三等者

宋興以來御試制科無登第三等者惟有第四等不一
余皆四等而上並為及第此則落之

三諫官詩

慶厯初永叔方平素俱除諫官君謨作詩以賀曰御筆
新除三諫官喧騰朝野競相歡當時流落丹心在自古
忠良得路難必有謨猷裨帝右直須風采動朝端世間
萬事俱塵土留取功名久遠看三人以其詩薦於上尋
亦除諫官

詩句作圖

古今人掇取好詩句作圖此特小巧美麗可喜一曲之

智則能之故句圖多歌詠風景形似百物將以觀雄材
遠思不可得也然雄材遠思人亦自多好句可入句圖
梅聖俞愛嚴維詩柳塘春水漫花塢夕陽遲則善矣然
細察之夕陽遲則繫花春水慢不須柳也如杜工部云
深山催短影喬木易高風此了無瑕累又杜云蕭條九
州內人少虎豹多少人慎莫錯多虎信所苛饑有易子
食獸猶畏虞羅如此等句其含蓄深遠殆不可模倣

西山詩

洪州西山與滕王閣相對客多留詩於壁嘗有僧來讀之已而告郡守曰詩盡不佳何不除去守愕然詰之曰僧詩能佳乎僧因即吟曰洪州太白方積翠倚穹蒼萬古遮新月半江無夕陽守異之遣去

奏獻浼瀆

太祖親征北庭師還途中御製詩有鑾輿臨紫塞朔野凍雲飛遂仝何蒙進鑾輿臨紫塞朔野凍雲飛詩白對嘉賞授贊善詩有塞日穿痕斷邊雲背影飛縹緲隨黃

屋陰沈護紫微俄一縣尉宋捷督護輦道倚其姓名之
識旋覲一官因而草疏歌頌進不已諸科亦叩行在乞
免文解其表面籤題云進上官家趙浼瀆疏展有司亟
請至銀臺應奏御文字先經本臺對駁方進因而少戢

章樞密喜養生

章樞密惇少喜養生性尤真率嘗云若遇饑則雖不相
識處亦須索飯若食飽時見父亦不拜在門下省及樞
密益喜丹竈餌茯苓以却粒骨氣清粹真神仙中人蘇

子瞻贈之詩云鼎中龍虎黃金賤松下龜蛇綠骨輕蓋

謂是也

見東軒
筆錄

事實類苑卷四十